

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat

**(Akeqanngitsumik biileqarnerup, akiliunneqarluni
angalanerit, akeqanngitsumik oqarasuaateqarnerit,
akeqanngitsumik internetseqarneq, akeqanngitsumik
nerisaqarnerup, akeqanngitsumik
ineqartinneqarnerup akileraarutitigut nalinga,
akileraarutini ilanngaatinik il.il. inatsimmi
aalajangersaaneq, suliffeqarfiit nunani allani
illersornissamut oqartussat sullillugit suliassanik
suliarinnittartut Kalaallit Nunaanni akileraarutitigut
angerlarsimaffeqarnissamik pisussaaffeqarnerat,
transfer pricingimi uppernarsaasiinissamut
piumasaqaatinik naammassininnginnermi
pineqaatissiissutit aamma ingerlatseqatigiiffiit
akileraarummik akiliigallartarnerat il.il.)**

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaanni nr. 11, 15. november 2007-imeersumi, Inatsisartut inatsisaanni nr. 3, 30. november 2009-meersumi, Inatsisartut inatsisaanni nr. 8, 3. december 2012-imeersumi, Inatsisartut inatsisaanni nr. 18, 26. juni 2017-imeersumi, Inatsisartut inatsisaanni nr. 23, 13. November 2017-imeersumi, Inatsisartut inatsisaanni nr. 22, 28. november 2018-imeersumi, Inatsisartut inatsisaanni nr. 41, 2. december 2019-imeersumi, aammalu kingullermik Inatsisartut inatsisaanni nr. 12, 19. november 2020-meersumi allanngortinneqartumi, makkua allanngortinneqarput:

1. § 2, imm. 6, imatut oqaasertalerneqarpoq:

” Imm. 6. Imm. 1 malillugu akileraartussaataitermi taamaallaat isertitat aamma isertitanut tunngavigineqartussat taaneqartut kisimik pineqartunut ilaatinneqarput, taamatullu aningaasartuutit isertitanut imaluunniit isertitanut tunngavigineqartussanut taakkununga tunngassuteqarpata, aatsaat taakkua ilanngaatineqarsinnaallutik. Inunnut imm. 1, nr. 1 malillugu akileraartussaataasunut, aningaasarsiarititat 10 procentiinik, taamaattoq ukiumut amerlanerpaamik 1.000 koruuninik, ilanngaasiisoqassaaq.”

2. § 3-p kingorna ilanngunneqarpoq:

” § 3 a. Suliffeqarfiit nunani allani illersornissamut oqartussat isumaqatigiissuteqarfigalugit sumiiffinni kommunit aggornerisa avataanni suliassanik suliarinnittut, aktiaatileqatigiiffittut imaluunniit piginneqatigiiffittut Kalaallit Nunaanni angerlarsimaffeqartutut nalunaarsorsimasuussapput aammalu taakkua aqutsui Kalaallit Nunaanniissallutik.

Imm. 2. Imm. 1 taamatuttaaq suliffeqarfinnut imm. 1 naapertorlugu kommunit aggornerisa avataanni suliassanik suliarinninnissaq pillugu nunani allani illersornissamut oqartussanut isumaqatigiissuteqarsimasunut entreprenøritut, pilersuisutut il.il. suliassanik suliarinnittut, aammalu taakkua ataanni entreprenørinut, pilersuisutut il.il. entreprenøri, pilersuisoq il.il. sullillugu suliassanik suliaqartunut, taamaaqataanik atuutissaaq, taamaattoq imm 3 takuuk.

Imm. 3. Suliffeqarfiit imm. 1-mi aamma 2-mi pineqartunut ilaasut, tamatumunnga pissutsit immikkorluinnaq ittut tunngavilersuutigineqartillugit, imm. 2-mi pineqartunut ilaasunit allaanerusunik entreprenørinik, pilersuisunik il.il. atuisinnaapput.”

3. § 18, imm. 3, imatut oqaasertalerneqarpoq:

” Imm. 3. Ukiup isertitaqarfiusup tullianut erniat ikinnerpaaffissaannut annertussusiliussaq Akileraartarnermut ingerlatsiviup ulloq 20. december tikitsinnagu aalajangersassavaa.”

4. § 19, imm. 2-mi, ”60.000” allanngortinneqassaaq imaalerlugu: ”70.000 (2022-mi inissisimaneq)”.

5. § 19, imm. 3-mi, ”30.000” allanngortinneqassaaq imaalerlugu: ”35.000 (2022-mi inissisimaneq)”.

6. § 19, imm. 4-mi, ”15.000” allanngortinneqassaaq imaalerlugu: ”17.500 (2022-mi inissisimaneq)”.

7. § 19 a, imatut oqaasertalerneqarpoq:

” § 19 a. Ajunngitsorsiassat imm. 2-8-mi taaneqartut, § 75, imm. 1-mi taaneqartutut A-nik isertitaqartunut atugassiisutiginneqartut, nalingi imm. 2-8-mi allassimasutut aalajangersarneqassapput, taamaattoq takuuk imm. 9. Taamaaqataa ajunngitsorsiassanut inunnut siulersuisunut, ataatsimiititalianut, isumalioqatigiissitanut, siunnersuisooqatigiinnut, aalajangiisartunut imaluunniit allanut ataatsimoorlutik oqartussanut, ilanngullugit Naalakkersuisut, Inatsisartut aamma kommunalbestyrelsit, ilaasortatut imaluunniit ikiortasussatut toqqagaasunut atugassiisutiginneqartunut, kiisalu pissutsit allatigut immikkoortumi tassani ilaatinneqanngippata, § 86, imm. 3-mi taaneqartutut amerlanerussuteqartunik aktiaatilinnut, ajunngitsorsiassanik ingerlatseqatigiiffimmit pineqartup amerlanerussuteqartunik aktiaateqarfigisaanik atugassiisutiginneqartunut, atuuppoq.

Imm. 2. Akeqanngitsumik ineqartitaanerup nalinga nr. 1-3-imi aalajangersakkat malillugit ingerlatsinermut akiliummut aningaasaliissutinit iluanaarutit ilanngullugit katinnerisut naatsorsorneqassaaq, taamaattoq takuuk imm. 9:

- 1) Ingerlatsinermut akiliut ilaqutariinnut ataatsinut illunut aammalu illunut affarleriinnut m^2 -imut 461 koruuniuvoq (2022-mi inissisimaneq) aammalu inissiarisuarunut aamma illunut uiguleriinnut il.il. m^2 -imut 512 koruuniulluni (2022-mi inissisimaneq).
- 2) Aningaasaliissutinit iluanaarut inissiap pissarsiarinerani akiata kingusinnerusukkut allangortiterinermut imaluunniit pitsanngorsaaneermut aningaasartuutit ilanngullugit 1,5 procentianik annertussuseqarpoq. Taamaattoq inissiap pissarsiarinerani akia m^2 -imut 7.000 koruuninit (2022-mi inissisimaneq) aammalu 2022-mi m^2 -imut 21.000 koruuninik, 2023-mi m^2 -imut 28.000 koruuninik aamma 2024-mi m^2 -imut 35.000 koruuninik appasinnerusinnaanngilaq. Ukioq isertitaqarfusoq 2025 aallarnerfigalugu pissarsiarinerani akia qaffasinnerpaaq m^2 -imut 35.000 koruuniusoq (2024-mi inissisimaneq) akigititanik naleqqussaaneermut procentiliussamik iluarsineqassaaq, takuuk § 19 c.
- 3) M^2 -imut pissarsiarinerani akia appasinnerpaaq 7.000 koruuniusoq, atortulersuutitut ikkussukkanut il.il. inissiami amigaataasunut makkununga tamaginnut immikkut m^2 -imut 1.000 koruunimik annikillisinneqartassaaq (2022-imi inissisimaneq):
 - a) Uffarfik imaluunniit anartarfik imermik kuutsittagaq.
 - b) Kiassaateqarfimmiit kiassarneq, kiassaateq uuliatortoq imaluunniit innaallagissamik kiassarneq.
 - c) Innaallagjaq.
 - d) Imeq imaluunniit imermut tanki.
 - e) Gassi imaluunniit innaallagjaq uunnaaneermut atorineqartussaaq.
 - f) Naternut, qilaamut iikkanullu oqorsaaneq kiffutissanit mineraluldinit 250 mm-init annikinneruppat. Oqorsaasersuutit allat atorineqarsimappata, oqorsaasinnaassusaa mineraluldinut naatsorsorneqassaaq.

Imm. 3. Inissiamik atuisinnaatitaaneermut, takuuk imm. 2, pequtitik tamakkiisumik ilaannaasumilluunniit atuisinnaaneq ilaatinneqarpat, ukiumi isertitaqarfusumi pequtit nalingi akeqanngitsumik ineqartitaanerup nalingata, imm. 2 malillugu inernerata paasineqartup, 5 procentianut annertussusilerneqassaaq.

Imm. 4. Pisortanit atugassiissutigineqartumik akeqanngitsumik najugaqarallartunut utaqqiisaasumik najugaqarallartunulluunniit ineqartitsinerup nalinga inissiap angissusaa malillugu qaammammut makkununga aalajangersarneqarpoq:

- 1) Inoqutigiinni ilaasut saniatigut allat igaffimmi imaluunniit perusersartarfimmi atortorissaarutitut atorineqartunut atuisinnaatitaappata, inimut imaluunniit ineqqamut ataatsimut 1.000 kr. (2022-mi inissisimaneq).
- 2) Inissiani immikkoortuni 1-imik imaluunniit 2-nik initalinni 2.000 kr. (2022-mi inissisimaneq).
- 3) Inissiani immikkoortuni 2.500 kr. (2022-mi inissisimaneq) 3-nik initalinni.
- 4) Inissiani immikkoortuni 3.500 kr. (2022-mi inissisimaneq) 4-nik initalinni.
- 5) Inissiani immikkoortuni 4.500 kr. (2022-mi inissisimaneq) 5-inik amerlanernilluunniit initalinni.

Imm. 5. Ineqqami, inissiaaqqami igaffeeralimmi assigisaannilluunniit akeqanngitsumik ineqartitaanerup nalinga ukiumut 17.500 koruunimut aalajangersarneqarpoq. (2022-mi inissisimaneq), taamaattoq takuuk imm. 2 aamma imm. 9.

Imm. 6. Akeqanngitsumik nerisaqartitaanerup nalinga tamakkiisumik nerisaqarneermut ullormut 80 koruunimut, ilaannakortumik ullormut marloriarluni nerilluni nerisaqarneermut ullormut 59 koruunimut, aammalu ataasiarluni nerilluni nerisaqarneermut ullormut 45 koruunimut aalajangersarneqarpoq (2022-mi

inissisimaneq), taamaattoq takuuk imm. 9.

Imm. 7. Akeqanngitsumik internetseqarnerup nalinga ukiumut 6.000 koruunimut aalajangersarneqarpoq.

Imm. 8. Akeqanngitsumik oqarasuaateqarnerup nalinga ukiumut 6.000 koruunimut aalajangersarneqarpoq.

Imm. 9. Ajunngitsorsiasat killilersugaanngitsumik niuernermining nalinga nalinginit aalajangersarneqartunit 20 procentimut appasinnerusoq uppersarneqarpat, pisuni imm. 2-8-mi taaneqartunit nalingisa appartinnissaat suliani ataasiakkaani akileraartussaataasup imaluunniit unerartitsisussaataasup piumasaqarneratigut akileraartarnermut ingerlatsiviup akuerisinnaavaa. Ajunngitsorsiasat pineqartut nalingi, nalinginit aalajangersarneqartunit 20 procentimut qaffasinneruppata, pisuni imm. 2-6-mi taaneqartunit nalingi suliani ataasiakkaani akileraartarnermut ingerlatsiviup qaffassinnaavai."

8. § 19 a kingorna ilanngunneqarpoq:

" **§ 19 b.** Akiliunneqarluni angalanerit § 34, imm. 1, nr. 15-imi taaneqartut eqqaassanngikkaanni, akiliunneqarluni angalanerit nalingi aningaasartuutitut sulisitsisup angalanermut akiligaannut, aalajangersarneqassapput, taamaattoq takuuk imm. 2 aamma 4.

Imm. 2. Taamaattoq Kalaallit Nunaanni aallarfiup Kalaallit Nunaannut ornigassamut uterlugulu imaluunniit Kalaallit Nunaanni aallarfiup Københavnimut uterlugulu akornanni ataasiarluni akiliunneqarluni angalanerup nalinga, nr. 1-3-mi annertussusiliussanit annertunerusinnaanngilaq. Angalanermi akigitaq Københavnimut angalanerup akianit annertunerunngippat, Københavnimukarnissamut taarsiullugu ornigassaq alla Kalaallit Nunaannut toqqaannartumik timmisartumik attaveqartoq atorneqarsinnaavoq. Angalanermut aningaasartuutitut uppersaateqanngippat, takuuk imm. 1, akiliunneqarluni angalanerup nalinga aalajangersakkami matumani ilaatinneqartoq aalajangersarneqassaaq:

1) Angalanermut ataatsimut 17.680 kr. (2022-mi inissisimaneq).

2) Meeqqamut 2-nit 11-nut ukiulimmut ataatsimut angalanermut ataatsimut 8.840 kr. (2022-mi inissisimaneq).

3) Meeqqamut 2-t inorlugit ukiulimmut ataatsimut angalanermut ataatsimut 1.760 kr. (2022-mi inissisimaneq).

Imm. 3. Ullut ilai inuussutissarsiornermut siunertanut aammalu ullut allat nammineq inuttut siunertanut atorneqartillugit angalanerit nalingi imm. 1-imituulli akileraaruserneqassapput, nalinga ullunik inuussutissarsiornermut siunertanut atorneqartunut naleqqiussilluni annikillisinneqassalluni. Taamaattoq angalaneq feeriarnerup, qaangiuttoornerit sulinngiffeqarfiginerisa, sulinngiffeqarnerup imaluunniit nammineq inuttut siunertap taamaaqataata sivilissusaa uninngaarnerup 50 procentianit sivilissusimappat imaluunniit ullunit ataqatigiissuni 5-init sivilissusimappat, aatsaat angalaneq akileraaruserneqassaaq. Aammattaaq nammineq atukkat nalingi minnerpaamik 1.000 koruuniussasoq piumasaqaataavoq. Oqaaseqatigiit siulliit aappaallu malillugit naatsorsuinermining ullut angalaaffusut, arfininngornerit, sapaatit nalliuttulli ilanngunneqassanngillat. "Ullut nalliuttut" paasineqassaaq tassaasut ukiutoqqap ullua, ukiortaap ullua, kunngit pingasut ulluat, sisamanngorneq illernartoq, tallimanngorneq tannaartoq, påskip ullua, påskip ulluata aappaa, tussiarfissuaq, qilaliarfik, pinsip ullua, pinsip ulluisa aappaat, Kalaallit Nunaanni inuiattut ullorsiorneq, juallip unnukkuutaava, juullerujussuaq aamma juallip naggataa.

Imm. 4. Feeriarnissaq siunertaralugu sulisup nalinginnaasumik najugaqarfiata aammalu

suliffiugallartussap, imaluunniit aalajangersimasumik suliffiusussap, pineqartup sulinermini uninngaarfieqqusaanngisaata akornanni angalanerit, angalanermut ataatsimut 2.000 koruuninik akileraaruserneqassaaq.

§ 19 c. Ukioq isertitaqarfusoq 2023 aallarnerfigalugu ilanngullugulu § 19, imm. 2-4mi, § 19 a, imm. 2, nr. 1-2-mi, § 19 a, imm. 4-6-mi aamma § 19 b, imm. 2, nr. 1-3-mi naligitat akigititanik naleqqusaanermut procentiliussamik iluarsineqassapput. Nalingi koruunit aningaasartaannut iluitsumut qaninnermut annikillisinneqassapput. Akileraartarnermut ingerlatsiviup ukiup isertitaqarfusup annertussusiliussat atuuffissaata siuliani kingusinnerpaamik qaammatisiutit malillugit ulloq 10. oktobari ukiumut isertitaqarfusumut annertussusiliussat atuuttut ukiumoortumik nalunaarutigisassavai.”

9. § 20, imm. 2, imatut oqaasertalerneqarpoq:

” Imm. 2. Akileraaruteqaataasussaannigitsut aningaasartai 5.000 koruuniupput.”

10. § 21, imm. 2, imatut oqaasertalerneqarpoq:

” Imm. 2. Ilannga aalajangersimasooq 10.000 koruuniuvoq.”

11. § 36 b, imm. 2-mi oqaaseqatigiit pingajuata kingornanut oqaaseqatigiittut nutaatut ilanngunneqarpoq:

”Akileraartussaataasooq akileraartarnermut ingerlatsiviup piumasaqarneratigut piffissamut killiliussap akileraartarnermut ingerlatsivimmit aalajangersarneqartup, kisianni ullunit 60-init sivikinnerusinnaanngitsup, iluani uppersaat nassiutissavaa.”

12. § 36 b, imm. 3, imatut oqaasertalerneqarpoq:

” Imm. 3. Akileraartussaataasooq imm. 1 malillugu paasissutissanik tunniussisimanngippat, akileraaruserinermik ingerlatsineq pillugu Inatsisartut inatsisaanni § 19, atuutsinneqassaaq.”

13. § 38 c, imm. 1, imatut oqaasertalerneqarpoq:

”Suliffeqarnermut ilanngaammut isertitat tunngaviusussat tassaapput isertitat A-t aamma B-t ataatsimut katillugit, aningaasat § 41, imm. 2 aamma § 47 b, imm. 6 malillugit iserititani akileraaruserussani ilanngunneqanngitsut ilassutigalugit.”

14. § 38 d, imm. 1, imatut oqaasertalerneqarpoq:

”Isertitanut tunngavissat naatsorsorneqarneranni, tunniussinerit imm. 2, nr. 1-4-mi aalajangersakkami tassani taaneqartut eqqaassanngikkaanni, tunniussinerit soraarnerussutisiaqalernissamut aaqqiussuussinerimut peqataasussaataaneq pillugu Inatsisartut inatsisaanni § 2, imm. 2-mi aamma 3-mi taaneqartut ilanngunneqassanngillat.”

15. § 63, imm. 2, imatut oqaasertalerneqarpoq:

” Imm. 2. Kommunini ataatsimoorussamik akileraarut 6 procentiuvoq.”

16. § 67, imm. 1, imatut oqaasertalerneqarpoq:

”Qaammatisiutit malillugit ukioq pineqartoq sioqqullugu ukiup affaani siullermi Inatsisartut

ataatsimiinneranni Inatsisartut allatut aalajangiisimannigippata, inummut ilanngaati annertussusissaa 48.000 koruuninut aalajangersarneqassaaq.”

17. § 73, imm. 1-imi oqaaseqatigiit siulliit imatut oqaasertalerneqarput:

”Ingerlatseqatigiiffinnut akileraarutit, nunamut tamarmut akileraarutit, kommuninut ataatsimoortumik akileraarut, kommunimut akileraarutit nunamullu tamarmut akileraarutit immikkut ittut kapitalimi matumani maleruagassanut naapertuuttumik akilersinniarneqassapput.”

18. § 75, imm. 1-imi, nr. 4-tut ilanngunneqarpoq:

”4) Ajunngitsorsiassat nalingi § 19, imm. 2-4-mi, §19 a-mi aamma § 19 b-mi pineqartunut ilaatinneqartut, sulitilluni pisuni atugassiissutigineqartut. Taamaaqataani, pineqarput ajunngitsorsiassat uniffik siullermi naaneqartut inunnut siulersuisuni, ataatsimiititaliani, isumalioqatigiissitani, siunnersuisooqatigiinni, aalajangiisartuni imaluunniit allani ataatsimoortuni oqartussani, ilanngullugit Naalakkersuisut, Inatsisartut aamma kommunalbestyrelsit, ilaasortatut imaluunniit ikiortaasussatut toqqagaasunut, kiisalu pissutsit allatigut immikkoortumi tassani pineqartunut ilaatinneqanngippata § 86, imm. 3-imi taaneqartut amerlanerussuteqarluni aktiaatilinni, ingerlatseqatigiiffimmit pineqartup amerlanerussuteqarluni aktiaateqarfigisaanit ajunngitsorsiassanik atugassiivigineqartut.”

19. § 83, imm. 3, imatut oqaasertalerneqarpoq:

” Imm. 3. Akileraarut B akilersugassani 12-imi qaammatit aallaqqaatai tamaasa akiligassanngortarpoq, qaammammi akiligassanngorfani ulloq akiliiffissaq eqqortoq kingulleq 20-ani pisussaalluni. Ulloq akiliiffissaq eqqortoq kingulleq sapaataappat, nalliuttuuppat imaluunniit arfininngorneruppat, piffissamut killiliussaq ulluinnaap tullianut sivitsorneqassaaq.”

20. § 85 kingorna kapitali 7-imi ilanngunneqarpoq:

”Ingerlatseqatigiiffimmut akileraarutaagallartoq

§ 85 a. Ingerlatseqatigiiffiit peqatigiiffiillu il.il. kingusinnerpaamik ulloq 31. decembari nammeneq kajumissutsiminnik ingerlatseqatigiiffimmut akileraarut ukiumi isertitaqarfusumi naatsorsuutigineqartoq akilersinnaavaat. Ingerlatseqatigiiffiup ukioq isertitaqarfusoq qaammatsiutit malillugit ukiumit allaanerutippagu (ukioq isertitaqarfusoq nikisitaq), kingusinnerpaamik ukiup isertitaqarfusup atorineqartup naannginnerani akileraarutaagallartoq akilerneqassaaq. Ulloq akiliiffissaq eqqortoq kingulleq sapaataappat, nalliuttuuppat imaluunniit arfininngorneruppat, piffissamut killiliussaq ulluinnaap tullianut sivitsorneqassaaq. Aningaasat akilerneqartut taagorneqarput akileraaruteqarallarneq.”

21. § 88, imm. 2-mi oqaaseqatigiit siulliit kingornanut oqaaseqatigiittut nutaatut ilanngunneqarpoq:

”Ingerlatseqatigiiffiit aktiaatiminnik il.il. niuerfimmi maleruagassiiviusumi niuerutigineqartussatut ilanngussisimasut imaluunniit pappiaqqanut nalilinnut sullissivimmi nalunaarsortitsisimasut, iluanaarutitik tigusaqartut taamaallaat ingerlatseqatigiiffiup ilisimasai pillugit paasissutissanik nalunaarutiginninnissamut pisussaaffeqarput.”

22. § 104-imi, imm. 2-tut ikkunneqarpoq:

” Imm. 2. Pissutsit imm. 1-imi pineqartunut ilaangitsut, piaaraluni imaluunniit mianersuaalliorujussuarluni pisussaaffimminik § 3 a malillugu pisussaaffigisaminik naammassinninngitsoq, mianersoqquneqarluni imaluunniit akiliisitaalluni pineqaatissinneqarsinnaavoq. Kalaallit Nunaanni Pinerluttulerinermut inatsimmi maleruagassat malillugit pisussaatitaasoq pisinnaatitaasorlu akiliisussanngortinneqarsinnaavoq.”

23. § 105, nr. 5-8 imatut oqaasertalerneqarput:

”5) § 46, imm. 2 malillugu akitsuutit uerartitsinissaminik naammassinninngitsoq,
6) § 46, imm. 1 malillugu akitsuutit uerartitanik piffissaagallartillugu akiliinngitsoortoq,
7) nakkutigineqartumik nuussinerit pillugit killilimmik uppersaasiisussaatitaanermut piumasaqaatit naammassineqarnissaat pillugu eqqunngitsunik paasinerluutaasinnaasunilluunniit nalunaaruteqartoq, takuuk § 39 b, imm. 4, imaluunniit
8) akileraartarnermut ingerlatsivimmiit piumaffigineqarluni nakkutigineqartumik nuussineq § 39 b, imm. 2, aamma nunamiit nunamut nalunaarusiaq malillugu suliarineqartussaatitaasoq, takuuk § 39 b, imm. 6-12 pillugu allaganngorlugu uppersaammik piffissaq eqqorlugu nassiussinngitsoq.”

§ 2

Inatsisartut inatsisaat ulloq 1. januar 2022 atuutilerpoq, taamaattoq takuuk imm. 2-4.

Imm. 2. § 1, nr. 1, 9, 10, 15, 17, 18 aamma 20, 1. januar 2023 atuutilissapput aammalu ukiumut isertitaqarfusumut 2023-mut atuutissallutik.

Imm. 3. § 1, nr. 13 aamma 14, inatsisip atuutilernerata nalunaarutigineqarnerata aqaguani atuutilissapput aammalu ukiumut isertitaqarfusumut 2021-mut suliffeqarnermut ilanngaati naatsorsorneqarneranut atuutissallutik.

Imm. 4. § 1, nr. 21, inatsisip atuutilernerata nalunaarutigineqarnerata aqaguani atuutilissaaq aammalu 2020-mi ukioq isertitaqarfusoq aallarnerfigalugu ilanngullugulu atuutissalluni.”

Namminersorlutik Oqartussat, ulloq 1. december 2021

Múte Bourup Egede
Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut